

Headline	TH tumpu pelaburan aset pendapatan tetap		
MediaTitle	Berita Harian	Color	Full Color
Date	16 Jan 2019	Circulation	69,985
Section	Bisnes	Readership	209,955
Page No	27	ArticleSize	471 cm ²
Language	Malay	AdValue	RM 16,236
Journalist	Mohd Anwar Patho Rahman dan Hazwan	PR Value	RM 48,707
Frequency	Daily		



TH tumpu pelaburan aset pendapatan tetap

→ Peralihan tumpuan daripada pasaran ekuiti pastikan pulangan lebih stabil

Oleh Mohd Anwar Patho Rahman dan Hazwan Faisal Mohamad
bhbiz@nsp.com.my

Lembaga Tabung Haji (TH) akan lebih memberikan tumpuan kepada pelaburannya dalam aset pendapatan tetap, berbanding pelaburan dalam pasaran saham.

Pengarah Urusan dan Ketua Pegawai Eksekutifnya, Datuk Seri Zukri Samat, berkata peralihan tumpuan itu adalah disebabkan TH bukan sebuah pengurus dana

tetapi sebaliknya adalah pengurus operasi haji.

"Justeru, fokus pelaburan kami seharusnya berubah. Saya fikir fokus kami kini akan lebih kepada pendapatan tetap daripada saham.

Keseimbangan pelaburan

"Ini bukan bermaksud kami tidak mahu melabur di dalam ekuiti, tetapi keseimbangan pelaburan itu akan lebih terarah kepada pendapatan tetap," katanya pada taklimat media mengenai prestasi semasa TH di Kuala Lumpur, semalam.

Mengulas lanjut, Zukri berkata pada 2016, 55 peratus aset TH dilaburkan di dalam pasaran saham yang kemudian dikurangkan kepada 50 peratus pada 2017.

Katanya, kadar pelaburan itu bagaimanapun dilihat terlalu tinggi memandangkan TH adalah pengurus operasi haji dan bukannya pengurus dana.

"TH kini merancang untuk melaksanakan penempatan aset baru. Bukananya kami mahu abaikan pelabur dan di dalam saham, tetapi saya fikir fokus TH selepas ini akan lebih terarah kepada pendapatan tetap, yang menawarkan pulangan yang lebih stabil.

"Kami belum membentangkan cadangan penempatan aset baharu ini kepada Lembaga Pengarah, tetapi secara peribadi saya fikir kami perlu memperuntukkan 60 hingga 70 peratus aset pelaburan ke dalam pendapatan tetap, bergantung kepada saiz dana yang kami miliki (selepas hibah diajukan)," katanya.

Dalam pada itu, Zukri berkata, pihaknya telah mengambil seorang pegawai kanan dari Bank Negara Malaysia (BNM) untuk mengetuai bahagian pengurusan risiko yang baru ditubuhkan di TH.

"Ketika ini, pengurusan risiko adalah antara bidang paling penting di TH yang perlu ditingkatkan kerana dalam setiap pelaburan yang mahu dibuat, kami perlu pertimbangkan kedua-dua perkara iaitu risiko dan ganjaran," katanya.

Pelaburan TH di dalam sekuriti pendapatan tetap termasuk pelaburan di dalam Terbitan Pelaburan Kerajaan (GII), sukuk korporat, kertas komersial, instrumen boleh runding Islamik, instrumen pasaran wang Islamik jangka sederhana dan pendek serta pembiayaan kepada subsidiari.



Ini bukan bermaksud kami tidak mahu melabur di dalam ekuiti, tetapi keseimbangan pelaburan itu akan lebih terarah kepada pendapatan tetap"

Zukri Samat,
Pengarah Urusan
dan Ketua Pegawai Eksekutif TH

